

UVOD

Funkcionisanje preduzeća kao sistema započinje pribavljanjem njegovih elemenata: radne snage, sredstava za rad i predmeta rada (materijala) u cilju izvršavanja određenog zadatka. U sklopu toga može se reći da se sredstva za rad i predmeti rada stalno angažuju u proizvodnji i na taj način se obezbijavaju materijalni uslovi za reprodukciju. Reprodukcija je stalno, neprekidno obnavljanje procesa proizvodnje kao preduslova za opstanak i razvoj svakog društva.

Često se poistovjećuje pojam sredstava za rad sa osnovnim sredstvima, međutim osnovna sredstva su mnogo širi pojam u koji, pored sredstava za rad ubrajamo i određena prava i potraživanja po osnovu stalnih sredstava. Ali ni sva sredstva za rad, nisu uvijek osnovna sredstva. To su, na primjer, sitan alat i inventar, koji ne ispunjavaju određeni vrijednosni kriterijum i čiji vijek trajanja nije duži od jedne godine.

Kako bi izvršilo svoj osnovni cilj i zadatak, i postiglo što veći profit za sebe i društvo u cjelini, preduzeće angažuje, pored radne snage i određena sredstva. Ova sredstva su neophodna za obavljanje djelatnosti u preduzeću i bez njih se ne može obavljati proces reprodukcije. Može se reći da su sredstva određeni ekonomski resursi koje kontroliše pravno lice, i rezultat su nekih prošlih događaja, čijom upotrebom u budućnosti se očekuje priliv prihoda.

U ovom radu sam se bazirao na definisanje sredstava preduzeća, izvršio sam osnovne podjele i aspekte posmatranja sredstava, a nakon toga objasnio svaki od osnovnih segmenata sredstava (osnovna i obrtna sredstva). Dakle, u prvom dijelu rada sam definisao pojam sredstava preduzeća i napisao najčešće podjele sredstava. Nakon toga sam obradio osnovna sredstva, definisao ih, nabrojao vrste osnovnih sredstava, kao i njihov način pribavljanja, upotrebe, trošenja (amortizacije) i rashodovanja. U trećem dijelu sam objasnio pojam obrtnih sredstava, definisao ih i izvršio najčešće podjele, sa različitih aspekata. I konačno, u četvrtom dijelu sam opisao trošenje obrtnih sredstava, razgraničio pojmove utrošak i trošak, nabrojao vrste troškova, i objasnio pojedine vrste.